



Alþýðusamband Íslands

Nefndasvið Alþingis
Austurstræti 8-10
150 Reykjavík
nefndasvid@althingi.is

Reykjavík, 27. febrúar, 2018
Tilvísun: 201802-0012

Efni: Frumvarp til laga um breytingu á lögum um skyldutryggingu lífeyrisréttinda og starfsemi lífeyrissjóða, nr. 129/1997 (jafnréttisstefna lífeyrissjóða).

Alþýðusambandi Íslands hefur borist til umsagnar ofangreint frumvarp þar sem að lagt er til að lífeyrissjóðir skulu setja sér jafnréttisstefnu sem nái til fjárfestinga sjóðsins og einnig að ársskýrslur sjóðanna geri grein fyrir framkvæmd jafnréttisstefnunnar.

ASÍ tekur undir þau sjónarmið sem fram koma í greinagerð frumvarpsins um mikilvægi þess að jafna stöðu karla og kvenna í íslensku atvinnulífi og að lífeyrissjóðir sem stórir aðilar á fjármálamarkaði hafi þar mikilvægu hlutverki að gegna.

Í stefnu ASÍ í lífeyrismálum er lögð áhersla á að lífeyrissjóðir á samningssviði sambandsins setji stefnu um siðferði og samfélagslega ábyrgð og séu ábyrgir hluthafar sem fylgi fjárfestingum sínum eftir m.a. með því að setja sér eigendastefnu. Flestir lífeyrissjóðir hafa á undanförunum árum unnið að innleiðingu og framkvæmd slíkra stefnumiða. Þá tók ákvæði, þess efnis að lífeyrissjóðir setji sér siðferðileg viðmið í fjárfestingum sem innleitt var í 36 gr. laga nr. 129/1997 um skyldutryggingu lífeyrisréttinda og starfsemi lífeyrissjóða, gildi þann 1. júlí sl.

Alþýðusambandið telur að sjónarmið um jafna stöðu kynjanna sé einn þeirra þátta sem sjóðunum beri að horfa til við mat á fjárfestingum út frá ofangreindum viðmiðum og stefnum því rúmist markmið frumvarpsins vel innan núgildandi laga.

F.h. Alþýðusambands Íslands

Marianna Traustadóttir,
sérfræðingur

Nefndasvið Alþingis
Efnahags- og viðskiptanefnd
Austurstræti 8-10
150 Reykjavík

Reykjavík, 28. febrúar 2018

Efni: Umsögn BSRB um frumvarp til laga um breytingu á lögum um skyldutryggingu lífeyrisréttinda og starfsemi lífeyrissjóða nr. 129/1997 (jafnréttisstefna lífeyrissjóða), 23. mál

BSRB hefur fengið til umsagnar frumvarp til laga um breytingu á lögum um skyldutryggingu lífeyrisréttinda og starfsemi lífeyrissjóða. Bandalagið tekur undir markmið tillögunnar. Almenn þegar markmið lagasetningar varðar samþættingu jafnréttissjónarmiða í stefnumótun og/eða ákvörðunartöku tekur gildissviðið til allra þeirra sem málið getur varðað. Samkvæmt þessu telur bandalagið að tillaga til lagabreytingar líkt og hér er til umsagnar eigi að taka til allra stofnanafjárfesta svo jafnræðis sé gætt.

Fyrir hönd BSRB



Dalla Ólafsdóttir
lögfræðingur BSRB

Alþingi
b.t. Efnahags- og viðskiptanefndar
v/ Austurvöll
150 REYKJAVÍK

27. febrúar 2018
Tilvísun: 2018020008

Efni: Umsögn um frumvarp til laga um skyldutryggingu lífeyrisréttinda og starfsemi lífeyrissjóða (jafnréttisstefna lífeyrissjóða), 23. mál.

Fjármálaeftirlitið vísar til tölvubréfs frá nefndarsviði Alþingis, dags. 7. febrúar 2018, þar sem óskað er umsagnar um frumvarp til laga um skyldutryggingu lífeyrisréttinda og starfsemi lífeyrissjóða (jafnréttisstefna lífeyrissjóða), 23. mál.

Fjármálaeftirlitið telur það augljóslega til bóta að lífeyrissjóðir hafi jafnrétti til hliðsjónar í fjárfestingarferli sínu. Hins vegar vill Fjármálaeftirlitið koma eftirfarandi ábendingum á framfæri við ofangreint frumvarp.

Þann 1. júlí 2017 tóku gildi lög nr. 113/2016, um breytingu á lögum um skyldutryggingu lífeyrisréttinda og starfsemi lífeyrissjóða nr. 129/1997 (fjárfestingarheimildir). Tilgangur laga þessara var að skýra fjárfestingarheimildir lífeyrissjóðanna og leggja áherslu á þau atriði sem nauðsynlegt er að stjórnendur og starfsmenn lífeyrissjóða horfi til við fjárfestingar sjóðanna. Aukin áhersla var lögð á að sjóðirnir fjárfesti í samræmi við skynsemissreglu og að áhættustýring sé efld í lífeyrissjóðunum. Þá kemur fram í 5. tölulið 1. mgr. 36. gr. laga nr. 129/1997, að lífeyrissjóður skal setja sér siðferðisleg viðmið í fjárfestingum.

Fjármálaeftirlitið minnir á að eignir lífeyrissjóðanna er skyldusparnaður almennings og er því afar mikilvægt að þær séu fjárfestar á þann hátt að fyrst og fremst sé horft til hagsmuna sjóðfélaga, þá með tilliti til ávöxtunar og áhættu fjárfestinganna. Fjármálaeftirlitið telur að með þeim breytingum sem urðu með gildistöku laga nr. 113/2016 hafi verið tekið stórt skref í þá átt að bæta áhættuvitund og áhættustýringu lífeyrissjóðanna. Fjármálaeftirlitið bendir jafnframt á að ef vilji er til að bæta við ákvæðum í VII. kafla laganna, um fjárfestingarheimildir lífeyrissjóðanna, er nauðsynlegt að horfa til kaflans í heild, þannig að fjárfestingarheimildir sjóðanna séu skýrar, auðskiljanlegar, að hægt sé að framfylgja þeim og að ákvæði kaflans séu í samræmi. Fjármálaeftirlitið telur að með þeirri viðbót sem lögð er til í frumvarpi 23/148 sé möguleiki á að minni áhersla verði lögð á að fjárfest sé í samræmi við skynsemissregluna, til að uppfylla þá skyldu að fjárfest sé í fyrirtækjum þar sem jafnvægi er í kynjahlutföllum í stjórn og framkvæmdastjórn. Þá bendir Fjármálaeftirlitið jafnframt á að viðmið lífeyrissjóðs um fjárfestingar í slíkum félögum gætu vel átt heima undir þeim siðferðislegu viðmiðum sem þeim ber að setja sér, skv. 5. tölulið 1. mgr. 36. gr. laganna.



FJÁRMÁLAEFTIRLITIÐ

THE FINANCIAL SUPERVISORY AUTHORITY, ICELAND

Með hliðsjón af framanrituðu telur Fjármálaeftirlitið það ákjósanlegra að lífeyrissjóðirnir setji sér sjálfir viðmið í tengslum við kynjahlutföll í stjórnnum og framkvæmdastjórn þeirra fyrirtækja sem þeir fjárfesta í, og þá að þau viðmið yrðu þá hluti af þeim siðferðislegu viðmiðum sem lífeyrissjóðum ber að setja sér skv. áðurnefndum 5. tölulið 1. mgr. 36. gr. laganna.

Virðingarfyllst,

FJÁRMÁLAEFTIRLITIÐ

Rúnar Guðmundsson

Sara Sigurðardóttir

5. mars 2018
Hallveigarstöðum, Reykjavík

Efni: Umsögn um frumvarp til laga um skyldutryggingu lífeyrisréttinda og starfsemi lífeyrissjóða (jafnréttisstefna lífeyrissjóða), 148. löggjafarþing 2017–2018. Þingskjal 23 — 23. mál.

Kvenréttindafélagi Íslands hefur borist til umsagnar frumvarp um breytingu á lögum um starfsemi lífeyrissjóða þar sem kveðið er á um að lífeyrissjóðir skuli setja sér stefnu er nái til fjárfestinga sjóðanna.

Kvenréttindafélag Íslands lýsir yfir almennri ánægju með frumvarpið og tekur undir með greinargerð flutningsmanna að með þessu frumvarpi sé verið að hnykkja á samfélagslegu hlutverki lífeyrissjóða að því er varðar jafna stöðu og jafnan rétt kvenna og karla í samfélaginu, og að í raun ætti þessi stefna að vera sjálfsögð og eðlileg. Kvenréttindafélag Íslands hvetur til þess að frumvarpið nái fram að ganga.



Brynhildur Heiðar- og Ómarsdóttir
framkvæmdastýra Kvenréttindafélags Íslands



Nefndasvið Alþingis
Efnahags- og viðskiptanefnd
Austurstræti 8-10
150 Reykjavík

Reykjavík, 26. febrúar 2018

Efni: Umsögn Landssamtaka lífeyrissjóða um frumvarp til laga um breytingu á lögum um skyldutryggingu lífeyrisréttinda og starfsemi lífeyrissjóða, nr. 129/1997 (jafnréttisstefna lífeyrissjóða), 23. mál.

Með tölvupósti frá nefndasviði Alþingis, þann 7. febrúar sl., var Landssamtökum lífeyrissjóða (LL) sent til umsagnar ofangreint mál sem kveður á um að lífeyrissjóðir skuli setja sér jafnréttisstefnu er nái til fjárfestinga sjóðsins og að í skýrslu stjórnar skuli tilgreind framkvæmd stefnunnar.

Mikil og hröð þróun hefur að undanfögnu átt sér stað í þá átt að krefjast þess að fjárfest sé með ábyrgð og sjálfbærni að leiðarljósi. Lífeyrissjóðir eru langtíma fjárfestar sem taka við iðgjöldum frá almenningi (sjóðfélögum), ávaxta þau og greiða út lífeyri. Lífeyrissjóðir fara því með viðamikla fjárhagslega hagsmuni sjóðfélaga sinna til langs tíma. Í því ljósi er sjálfsagt og eðlilegt að ríkar kröfur séu gerðar til þeirra m.a. um samfélagslega ábyrgð sem fjárfesta.

Á þessum grunni var, við nýlega endurskoðun á fjárfestingarheimildum lífeyrissjóða, sett ákvæði um að lífeyrissjóðum beri að setja sér siðferðileg viðmið í fjárfestingum, sbr. 5. tl. 1. mgr. 36. gr. laga nr. 129/1997, sbr. 4. tl. 4. gr. laga nr. 113/2016.

Hvað felst í siðferðilegum viðmiðum er afar matskennt og hefur helst verið litið til þess að átt sé við það að lífeyrissjóðir skuli setja sér stefnu í ábyrgum fjárfestingum og er þá almennt litið til þriggja flokka, það er umhverfi, samfélags og stjórnarháttar (environment, social and governance (ESG)). Jafnréttismálin falla þarna undir en þar má tilgreina fleiri þætti s.s. loftlagsmál, vatnsgæði, nýtingu orkuauðlinda, endurvinnslu og heilsufarstengd málefni.

Almennt ber að gjalda varhug við að binda hendur fjárfesta við að móta siðferðileg viðmið enda mikilvægt að svigrúm sé til staðar við þróun á siðferðilegu gildismati.


Varðandi jafnrétti kynjanna hefur lengi verið þörf á sérstökum áherslum og er hér á landi lögbundin skylda að líta til jafnréttissjónarmiða, sbr. sérstök lög um jafna stöðu og jafnan rétt kvenna og karla nr. 10/2008. Eru þau lög sett með það að markmiði að viðhalda jafnrétti og jöfnum tækifærum kvenna og karla á öllum sviðum samfélagsins. Þrátt fyrir það virðist raunin vera sú að konum hefur ekki fjölgað sem skyldi í stjórnunarstöðum innan fjármálageirans eins og rakið er í greinargerð með frumvarpi því sem hér er til umfjöllunar.

Í þessu ljósi má vel vera að þörf sé á að setja jafnréttismál skör ofar öðrum siðferðilegum viðmiðum og setja sérstök ákvæði í lögum um skyldutryggingu lífeyrisréttinda og starfsemi lífeyrissjóða sem skyldar lífeyrissjóði til að setja sér jafnréttisstefnu er nái til fjárfestinga. Slík

ákvæði kunna að hafa jákvæð áhrif. **LL leggja þó ríka áherslu á að varhugavert er að setja sérstakar kröfur á lífeyrissjóði í þessum efnum umfram þær kröfur sem gerðar eru til annarra stofnanafjárfesta.** Því liggur beint við að samhliða þessu frumvarpi verði það að lögum að lögfestar verði sambærilegar kröfur til stofnanafjárfesta, a.m.k. þeirra sem teljast til eftirlitsskyldra aðila. Í þessu sambandi ber að líta til almenns jafnræðis fjárfesta og því verður að telja eðlilega þá kröfu að lög og reglur sem um þá gildi séu sambærileg.

Virðingarfyllst,

f.h. Landssamtaka lífeyrissjóða



Þórey S. Þóðardóttir, framkvæmdastjóri